

新刻張太岳先生文集

新刻張太岳先生文集卷之二十

賀靈雨應祈表一

茲者我 皇上以夏令旣深雨澤未足乃躬叩於  
雷壇爲民虔禱 聖誠肫至 天鑒孔昭甘澍溥零  
遠近霑洽臣等誠懽誠忭稽首頓首稱 賀者伏以  
聖主念民依之重無歲不祈 皇穹鑒 帝德之  
馨有求輒應驗感通之素妙彰 眷佑之彌申喜溢  
堯衢懽騰舜畝恭惟 皇上道衆惟大 德並曰生  
鏡玉斗以調元 握璿樞而運化一知艱乃逸農  
功夙戒於三時 視民如傷王政必先於四者屬當

夏暮佇俟秋登雖 靈澤屢頒已兆豐穰之慶乃

宸情遇軫尚厯宵旰之憂慮邪氛或盤於休和致

鴻化有乖於發育叩瞻 昊極虔修齋禱之儀 勅

召風庭赫布驅穰之令果靈符應立致 嘉祥決

天漢之瓊波注流四野瀉 玄池之玉液沾漑群生

澤汪濊以旁邇氣縕緼而交鬯在原在隰欣觀長畝

之易禾如京如坻滿擬大田之多稼詎止增滋而溢

潤尤能解却以迎和 日月光華 乾坤清泰卽炎

帝之曰雨則雨未足彌神信 大人之先 天後

大罔不合德益顯 參贊彌綸之用永綏 康寧富

壽之禎臣等久荷 生成叨塵侍從衍龜嘯而省歲  
備紀休徵續麟史以編年特書大有莫効滴涓之助  
徒深林躍之誠伏願純嘏茂膺 洪禧丕衍五風十  
雨均調四序之和 億載萬齡永介一人之慶

賀靈雨表二

聖主勤民虔舉禱祈之典 皇穹眷德丕昭康阜之  
符景貺萃于 一人靈液覃于四表懽騰禹甸頌溢  
堯衢恭惟 皇上道合冲虛神凝淵穆心之所向先  
天而弗違澤之所敷與海而同潤頃者雨暘之未叙  
深軫稼穡之多艱 躬啓齋壇虔祈 玄渥綸音甫

下雷聲卽應于重霄法限方中電景弘宣 于三極  
惟 聖誠久而不替肆其澍漬而遂流宮廟百神共  
彰靈于爲雨山川郡祀咸效職于出雲初沾洒以霏  
微繼淋漓而汪濊祁祁入夜妙潤物于無聲滴滴崇  
朝昱農時于有巢青回壠麥開兩歧漢代之祥綠霽  
郊禾肇連穎周家之瑞和氣布而乾坤澄泰靈氛滌  
而日月光華蓋至 聖格 天保佑益隆于 駿命  
而惟 皇欽福豐穰茂衍于鴻禧所謂叅贊之極功  
幹旋之妙用也臣等幸逢 明盛忻覩禎嘉沐德龍  
池夙載涵濡之化承恩鳳沼彌懷漸被之仁伏願

慶祉天申休徵日集洗兵紫塞神功廓一統之謨齊  
政玉衡 聖治永萬年之業

賀靈雨表三

聖主對時因切民天之恤 帝宮肇祀用昭方社之  
祈惟天心助順而弗違故雨澤應期而捷降公私霑  
足遐邇懽呼恭惟 皇上聖德作新 靈忱默運顙  
惟邦本恒致重於農時對越 昊穹屢昭受于 帝  
貺茲值積陽少沴僅旬月雖必爲灾但當南畝載耘  
恐曠焚而遂將成厯時過不雨民失有秋齊滌秉心  
致 神祇之陟格 惕孚渙汗勉臣庶以靖恭方嚴

宸睟千璇階情殷露禱旋布滄雲于寶墀歌協雨  
公膏液垂蘇旱氛清滌始見飛甘灑潤祈祈偏浹于  
堯衢繼看沃稿回焦浥浥均沾于舜畝匪直寰中之  
瑞亦清塞外之塵蓋一德格天勅時幾以調化斯百  
神受職均福賜以佑民可謂協位育之全功叅彌綸  
之妙用者也臣等叨聯侍從久荷洪私均動植以濡  
恩莫效涓流之助霈乾坤而受澤徒承沐浴之光  
伏願 雨暘時若苗害弭消大田多稼而百谷用登  
不獨慰十千之望歲蒸民乃粒而萬邦作乂將併億  
兆以樂年

賀靈雨表四

甘霖應禱神庥昭洽乎兩間 勤念爲民 聖德貫  
通乎三極百靈效職萬姓騰懽恭惟 皇上極建中  
和曠古今而獨盛 化隆參贊合上下以同流精誠  
默契於 蒼穹膏澤久渾於黎庶無思不服有感必  
通曩惟瑞雪冬盈預啓百昌之兆邇者洊雷夏震幸  
清九塞之塵益霄旰每軫乎憂防而造化實歸其掌  
握茲當朱明屆候 赤悃申祈思稼穡之艱難下民  
所賴謂雨暘之時若上帝攸司秉一念以告虔肅群  
工而省過 皇情肫至 帝鑒昭孚月離畢以示期



山出云而布雷風霆迅發溝澮交流頃回普化之玄  
功大慰有秋之渴望忻忻草木盡懷沾溉之榮煦煦  
郊原均沐涵濡之貺臣等瞻依鴻化贊襄無補于  
天工沐浴太和詞頌敢忘于帝力伏願欽五福  
以錫庶民致太平于有象叙九疇而御皇極綏景  
福于無彊瀚海龍城寔協洗兵之慶太山梁甫嗣  
修檢玉之篇

賀靈雨表五

皇穹眷德昭感應于休徵聖主祈玄妙幹旋于大  
造滋百嘉而允遂滌諸沴以咸清慶洽家邦歆均朝

野恭惟 皇上仁義立極宜哲敷猷 軫念民生治  
府事而九功叙欽崇 天道在璣衡而七政齊玄冥  
獻瑞于瑤窠大皞流和于玉澍建<sub>未</sub>盡熟既瞻率育  
之貽耒耜竝興復兆屢豐之祉顧群吏不克修其職  
致三霖間亦愆其期以耜以耘在祿畝猶未病農時  
之役惟宵惟旰乃 朝廷則深憂稽事之艱將旱而  
惕焉恐其爲災旣雨而歆然以爲未足 齋壇肅肅  
叩法界以蔽冲儀 御墨煥煥戒祠曹而舉舊典  
宸衷所向 天用弗違 聖敬攸齊 神是具格言  
甫出而雷電交作限向終而雨澤遂盈和氣宜通廓

化機于長養 靈滋浹給普 帝力于栽培內以登  
稼舜田外以洗兵漢塞富強之業自是以彌光太平  
之基由茲而益固誠綱綸之妙用而位育之極功也  
臣等濫叨祿秩久荷生成仰 聖心之勤勞無能贊  
助觀 玄恩之優渥惟倍懼呼伏願賜雨常調乾坤  
永泰得 天人之應合萬福以駢臻納川岳之珍會  
千祥而畢集大振 皇威於有赫茂延 聖壽於無  
疆

賀靈雨表六

天垂玄貺鑒 一人昭假之誠民頌豐年衍四海昇

平之治仰休徵之嚮應信精意之潛孚福溢堯封懷  
均禹甸恭惟 皇上剛健中正 濬哲文明大德格  
天至仁育物政惟歲功之叙時若雨暘心存民食之  
依知先稼穡功侔 元宰撫運而五氣司辰道際貞  
符握紀而百靈受職頃因時曠卽軫 淵衷嚴所司  
以偏叩羣神肅齋壇而躬顧上帝誠無幽而弗達邁  
周宣雲漢之思神有感而卽通過成湯棗林之禱遂  
蒙赫鑒允答虔忱合四海以垂陰浹三朝而流澤潤  
回枯槁助 兩儀發育之功滋洽根莖若萬類生成  
之性山川增色草木含輝忻 雨露之霑濡識 化

工之幹運矧去冬之瑞雪已受明賜於來楚卽今日  
之甘霖定獲康年於黍稷郊廟之粢盛備矣烝黎  
之粒食盈焉帝德難名民生何幸三農鼓舞慶樂  
歲之有徵萬姓謳歌載洪恩之不冒臣等叨依禁  
從快睹嘉禎愧無涓滴之俾喜有優渥之霈伏願  
功光旻帝道貫重玄歛五福以錫庶民固群  
生而躋壽域日升川至介遐福于無疆雨施雲行保  
太保于有象

賀瑞雪表一

玄穹錫祐鑒一人昭格之誠靈澤敷祥啓萬宇

豐登之慶 贊神明而闡秘幹造化以成能喜溢堯  
衢懽騰舜畎恭惟 皇上心涵太始 德合況元  
兼覆幬持載之功草木昆虫咸若 盡栽成輔相之  
道雨暘寒燠維時每惟稼穡之孔艱無俾蒸黎之失  
所茲者一冬已半三白猶怪雖 玄工未至於愆違  
乃 宸慮預虞其早暵 竭精衷而默籲 上帝有  
赫鑒觀 渙綸命而 申勅有司無遺禋祀 純誠  
所積感若郵傳 眷祐素隆應如響答二儀之烝修  
醞釀以回和五穀之精遂繽紛而薦祉兆豐穰于闕  
歲啓農扈于先春寫曜九重漾瑤殿瓊堦之素彩霏

華千里蕩玉闌紫塞之塵氛況節屆乎履長而災消  
沴弭功既妙于扶陽且慶當夫首度而迎祉集禧

瑞允徵于 增筭益顯 叅贊彌綸之用永綏 康

寧富壽之庥臣等幸際熙朝樂觀 釐事衍龜疇而

省歲備紀休徵續麟紀以編年特書大有伏願 仙

祺茂介景福崇臻 先天弗違後天不老萬年調玉

燭之和 極地所載應地無疆四海輦金甌之固

賀瑞雪表二

誠格高穹誕應 九重之禱 功回造化卽占三白

之祥喜溢臣工懽騰朝野恭惟 皇上仁涵庶類道

梓重一作之期履豐亨之會內安宸宇藹協  
氣之勃沍外撫要荒快妖氣之頓息茂膺介福永  
錫休徵維茲季冬未霑雪澤仰勞宸念虔禱  
雪壇惟昊天昭鑒于一人肆同雲遂布于四野六  
花綢彩俄驚上苑之同春萬戶凝華似覩崑岡之照  
夜況積地臙旨盈尺雖委潤而不封條允爲豐歲之  
徵用表太平之象若被禽鳥之瑞徒飾耳目之觀至  
於草木之祥何補衣食之用試探徃藉莫盛今時此  
皆皇心昭合乎天心故玄澤同符于聖澤者也  
臣等叨司雍教幸際熙朝率多士以趨蹌豈勝雀躍



同萬民而歌頌莫罄豫鳴伏願 帝眷昭垂 神庥  
滋至十日雨五日風盛治長調玉燭九年耕三年積  
洪圖永固金甌

賀瑞雪表三

聖主惠民夙致精禋之禱 皇天眷德弘敷大有之  
徵澤溢竟封惟騰禹甸恭惟 皇上信報達雍熙之  
妙 中和成位育之功明德惟馨典秩百神之祀艱  
難乃逸念切小民之依頃以時澤之愆 上厯 淵  
衷之慮吉蠲對越屢躬叩于 皇穹昭格感孚遂仰  
承乎 帝貺一誠之潛通無間百靈之祐相有徵八

荒同雲千里一色瓊英皎潔散五谷之精華玉質秀  
霏獻六花之嘉瑞消沴而已占盈尺應時而不必封  
條山嶽增高根荇倍潤三農鼓舞歌帝力于康衢萬  
彙滋榮益春和于化國顧滋雨暘之時若實爲庶春  
之駢臻 天澤偕 聖澤以同施人情與物情而交  
暢臣等叨居侍從幸際 昌時仰 帝道之昭明荷  
天心之悅懌殊深忻忭莫罄榆揚伏願 彌綸成  
天地之能久大崇易簡之德休徵備至錫五福于  
庶民道化益隆行 萬年之盛治

賀瑞雪表四

洪化難名，膺瑞應九重之禱。太平有象，玄靈呈六出之奇。天雖高而聽則卑，聖惟誠而禱必應。仰震情而悅豫，溥臣庶以懽呼恭惟。皇上德並兩儀，治隆千古。留神宵旰，恒懷稽事之憂。加志閭閻，每切民天之重。茲者玄冬邁序，皓雪愆期。特軫淵衷，虔修日禱。竭誠將事，明德上契乎天心。申命用休，渥澤允符于膺。候百神效職，三白呈祥。琪樹繽紛，式現六花之瑞。瓊田璀璨，實爲五谷之精。綏綏不至，十封條佇見來庭之率育。皞皞漸成于盈尺，已知蟄騰之深藏。是蓋聖主敬天以保民，感孚有素，故穹

昊應祈而錫祝昭假孔神誠大祐之無前而真符之  
登見也臣等叨叅密勿無補獎調歌帝力于不識不  
知與億兆同其懽戴荷神功于至廣至大感 天地  
莫克形容伏願 玄祐彌隆休徵茂集卜萬年而御  
曆益臻戩穀之祥歛五福以錫民永保豐年之治

賀瑞雪表五

靈雪應祈允兆昇平之象 皇穹眷 聖式昭感極  
之誠喜氣春融懽聲雷動恭惟 皇上堯仁不冒舜  
德好生臻中和位育之功極叅贊財成之道祈寒暑  
雨洞密小民之艱黍稷稻粱恒切有秋之望屬冬時

之旣屆偶雪澤之猶愆爰軫宸衷恐妨農務齋心內  
殿惟翼翼以欽承 躬禱雪壇儼洋洋其陟降至誠  
必饗克敬惟親六合同雲遂作輕盈之絮九天飛霰  
旋開頃刻之花岡原皓若堆瓊衢路紛如連璧旣霑  
旣足永無螟螣之虞以耘以耔豫卜茨梁之積農謌  
于野忻 玄澤之兆豐士慶于朝仰 聖心之允合  
是皆 皇上功侔造化用能粒我蒸民者也臣等觀  
茲靈臈曷旣名言確呼敢效乎蟲鳴踊躍豈殊于獸  
舞伏願 道超無外德勢重玄收記魯年莫萬國于

國肆謌周雅祝 一人如山阜岡陵

賀瑞雪表六

天澤覃敷大地晃瑤瑤之積 皇誠感格玄冬啓稼  
穡之徵禹甸懽騰堯封慶洽恭惟 皇上道參太始  
運撫中興昭事九玄靈承列聖昇平有衆至仁已遍  
于寰區惕勵無忘秘禱猶勤于夙夜念食爲萬民所  
賴而雪乃五谷之精氣和則歲斯豐土潤而農始利  
仲冬小雪六花已灑于彌空季月大寒三白未盈于  
竟野庭壇齋祓知 聖躬之獨勞 簡錄敬陳荷天  
心之點檢是以宮謝再虔之日帝降初駕之辰同雲  
布而微霰零北風淒而密雪下由寸盈尺自旦及昏

樓閣參樓疑崇堦之卸壁飄花落絮似上苑之逢春  
應水腹之堅陰凝愈周迎土脉之動液滲潛通豈惟  
使牟麥之青榮用觀鑄鉦且能令虜氛之滅沒塞腹  
戈矛此誠至德之素孚而靈祝之上瑞也臣等才非  
曾史叨聯北闕之班學謝鄒枚敢獻梁園之賦惟深  
雀躍益戴 鴻私伏願 彌綸成天地之能久大昭  
易間之善神禧雪擁帝祉日新七政齊而太階平永  
田功于九扈三靈衛而多祐集綿 聖壽于億齡

賀瑞雪表七

伏以

法嗣

冲玄

靈貺應

一人之禱陽回霄

壤祥霏霏五穀之華三時可卜其順成率土盡融于  
和暢仰宸情之悅豫喜溢龍顏沐聖澤之沾  
濡歡騰黎首恭惟皇上道平真漢功卽康田栽  
成輔相以成能參贊彌綸而建極覃仁慈于宇內  
民已安而軫念如傷運造化于掌中天不違而欽  
崇愈邇是以豐年屢慶邦孚至治以無虞協氣嘉生  
瑞應太平之有象茲以玄冬臨季雪澤未均日以熯  
之天意殆相工倕而布暖歲云暮矣聖心欲啓  
農扈于先春乃渙綸音爰匱露禱惟至誠之昭  
格斯冥感之潛通內壇肇啓同雲已布于璇空一



齋館裁臨密霰遂敷于瑤甸始繽紛乎散絮俄皎潔  
以推瓊霏霏浮浮每卽形而賦象應應奕奕愛潤物  
之無聲忽驚雀翥之翩翻倏見花開于頃刻自此而  
澤來麴根芟倍潤從茲而消厲禔關塞無塵彼珍禽  
異卉徒瑰奇于耳目顧何裨衣食之源卽和璞隋珠  
雖充溢于圓方未必立蒸黎之命唯茲 上瑞實曰  
休楨臣等調燮無功 恩暉藉被 殿廡宵直疑  
臨不夜之仙城 宮闕曉瞻驚入長春之福苑慶倍  
尋常于萬萬心同品彙以忻忻伏願 景福茂臻  
玄麻滋至渥五帝之瑤圖而凝命調兩間之玉燭以

當天百禮告成歲歲享周田之利三農不害人人磨  
堯壤之歌

賀冬至表一

玉律迎陽萬國際天開之運璇穹篤祐一人凝  
日至之禧乾元肇啓于鴻鈞聖壽崇增于鳳紀慶  
綿宗杜喜溢寰區恭惟皇上體道冲和願神  
淵默建中建極動靜合天地之心饗帝饗  
親齋戒通神明之德協虞璣而齊七政叙箕範  
以備庶徵維茲極辨之熙朝載值履長之令節  
斗杓旋子月當三統之先昴宿殷宵序屬六陽之始

淑氣漸滋于玄籥元聲默應于黃鍾魯史書占睹雲  
容之表瑞周主測景喜日馭之延暉兩堦騰肆樂之  
懽四海慶寢兵之候纓綏畢集玉帛交陳 肅五夜  
而叩 露壇柢荷 重玄之鑒踰十辰而逢 景旦  
預開首度之祥 湧祉流禧沛若水泉之初動 益  
齡增筭晉如陽德之方亨歲運維新 宸釐有美臣  
等叨陪近列幸際 昌辰才謝八能莫叶鈞天之奏  
情深三祝惟同嵩嶽之呼伏願 純嘏緝熙 太和  
保合立天地人之極而垂未五位永綏皇極之洪圖  
培壽福祿之元而 御曆萬年茂衍泰元之神筭

賀冬至表二

殷昴升辰式協仲冬之候履長迎福載陳亞歲之儀  
喜 聖主之當陽見天心之來復紀貞元而應度按  
時令以承禧海宇交懽臣工洽慶恭惟 皇上道涵  
泰始識洞玄微謨烈冠乎百王功德超乎千古撫五  
辰而順序齊七政以明時得 天統之攸長世數周  
而復始荷神明之眷祐 國祚永而益昌茲者 序  
屬殷 冬時逢周正黃鍾啓律感緹室之璇和玄籥  
生春適融風之始暢珠星璧月燦 穹極以呈暉  
舜日堯年迓天休而延吉望魯臺書雲物之慶測漢

表識陰陽之和休矣祥開昭茲貺施禮方嚴于大報  
時允謂之昌辰臣等叨列清班忻逢盛會吹噓有藉  
幸同六琯飛灰裨補無能愧比五紋弱線但深忭躍  
倍切瞻依伏願 聖曆丕延治運乘陽而並進 皇  
晷孔赫壽源與時而俱增申錫無疆肇億萬千年之  
鼎盛思 皇多祐迓三十一載之泰來

賀冬至表三

黃鍾協律一元涵發育之仁 紫極迎長 萬國仰  
亨嘉之會淑氣充盈于禹甸懽聲偏溢于堯衢百祿  
是道四方來賀恭惟 皇上道侔覆載 德冠古今

神聖登樞大化乎而金甌永固中和建極玄機運  
而玉燭均調政順旋衡配歲時而成序 恩加寰宇  
茂品物以偕春茲當履至之辰正值陽生之候培灰  
浮煖識六氣之潛萌圭景延暉知七日之來復宮線  
初添乎弱縷臺雲已驗夫書祥臣等幸際昌期叨塵  
近列望龍光于咫尺實切瞻依 罄雀躍以颺言倍  
增忻忭伏願 靈承帝貺保合太和天地位而上下  
鬼神以寧臻蕩蕩巍巍之治太階平而麟鳳龜龍畢  
至成熙熙皞皞之功

賀冬至表四

天開於子一陽肇資始之功日至於南五位納履  
長之慶儀陳亞歲瑞集熙朝恭惟皇上明聖  
當天大君御極對時弘化踰三紀而仁洽兆民  
治保邦纂列聖而德超千古願神淵默獨觀萬  
化之原體道冲和恢復一元之會撫五辰而凝  
績政在扶陽開二儀以爲功恩昭育物禮明樂  
備成聖人制作之能文治武功見王者經綸之  
迹四時合序九域同風茲載啓乎昌辰益茂承  
乎景貺天宮啓動聲元已應乎黃鍾緹室灰  
飛晷影漸舒于繼線觀堯星之正昴物類昭  
蘇應周月之授時神人闔懌協

氣光盈于 紫極 穹陰退謝于玄枵窮塞寢兵喜  
邊氛之靖息清臺觀象書零物之新嘉臣等叨陪文  
石之班敬效華封之祝伏願 宸承 帝貺 保合  
太和一日以體元遠過夏時之曆數 萬斯年而  
御運 長歌 舜日之光華 一人膺祐命之純四  
海樂昇平之盛

賀冬至表五

六琯吹葭緹室迓一陽之來復三垣正斗璇霄晴萬  
衆之維新弘開發育之機茂著 裁成之績暖回寒  
谷人樂熙臺恭惟 皇上 大智先天至仁徧物剛



健體乾行而不息 文明煥離照以無疆盡制盡

兼于聖百王作述之盛丕承丕顯增 二祖 七宗

謨烈之光禮序樂和德化徵于有衆民安物阜惠澤  
浹于無垠夏霖冬雪皆應祈而歲功已就北狄東夷  
俱效順而邊警不聞茲逢南至之辰益進大來之吉  
午中立表圭日布影于初長子半迎陽璧月流輝于  
既望推元紀曆數符周統之得天觀氣書雲瑞協軒  
轅之獲鼎黃輿貢祉 玄象昭麻 景運當三十年  
周而復始 聖壽綿億萬載久而彌昌臣等襍櫟才  
微愧無裨於 龍衣涓埃念切期仰荅乎 鴻鈞對

時陳獻履之衷叩 闕致呼嵩之祝伏願 道同陽  
長由臨入泰以亨隆治與日升咸五登三而炳燿乾  
坤高厚永回 奕世之金甌日月光華恒映太階之  
玉燭

賀元旦表一

律鍾太簇青陽布六合之和斗正孟陬黃道呈五雲  
之瑞兩儀交太萬國朝宗慶洽神人灌騰遐邇恭惟  
皇上握符凝命應運紹基敬一接群聖之傳中和  
建四方之極神威一震逆醜自芟 聖武方昭夷氛  
悉蕩治功超乎前古乾清坤寧仁澤徧于寰區民康

物阜茲屆三陽之令節實逢千載之昌期  
堯曆載頒察璣衡于三百六旬之始夏正允協調玉燭于七十二候之初  
迓淑氣于鵬霄垂憲章於象闕  
紫殿納萬邦之耑藉彤庭會四海之衣冠  
化日舒長太平有象玄庥昌熾申錫無疆  
臣等久荷生成並叨祿秩際新元于端月祝獻  
南山慶首節于清朝心馳北極伏願  
撫三辰以凝績歛五福而錫民獨運乾剛  
君德益亨于九五靈承天眷帝壽永綿於億千

賀元旦表二

端月紀辰蒼極布始和之衆王春司令

此辰臻首

祚之祥麗曉色于金鋪動韶年于玉律

鳳曆越三

旬而再啓龍圖際九葉以益昌邦國乂寧地天交泰

恭惟皇上德象帝先道同乾運

撫五辰而凝績與

日偕新齊七政以授時體天行健和氣召四靈之瑞

玄威靖九塞之塵是以

上帝居歆瑞

雪應明

禋之禱

天心助順神武收不戰之功祈至治之無

虞徵太平之有象茲者當三陽開泰之候正萬物出

震之時氣轉鴻鈞共樂

堯天之化日春回郊黍已

消燕谷之陰寒彤庭藹瑞雪之積紛閭闔現卿雲之

燦爛應條風而送暖人與物皆在春臺獻椒頌以迎  
祥君育民同登壽域璣衡正而黃道闢玉燭調而太  
階平普天仰陽德之方亨率土賀乾元之正始是誠  
天啓維新之運而神扶永命之基也臣等秩首班  
行恩深眷遇涵濡德澤同萬物以生輝拜舞衣冠  
仰九天而稱賀懽忻倍切感激難名伏願 茂介  
陽禧誕膺 玄祐聖法天天法道 聖壽齊天地以  
無疆國保治保民 國祚鞏山河而永固  
賀元旦表三

三陽啓泰乾坤昭化育之仁

萬類回春海宇際亨

加之會歲月更新于鳳曆氣機初轉于鴻鈞遐邇騰  
權臣民胥悅恭惟 皇上神功撫運至德統天正位  
居貞仁義幹陰陽之用對時育物弛張綜闡之機  
齊七政以勤民撫五辰而凝績 聖敬上孚于穹昊  
皇風覃被于遐荒外順內安九有載 堯天之浩  
蕩時豐歲美兆民忻 舜日之光華 聖人極裁成  
輔相之能世道躋雍熙太和之盛茲者元正首祚上  
日發春 明堂宏啓于青陽 閭闔煥開于黃道農  
祥展正煖回萬井之暉姬訾日臨光映千門之曙誕  
布始和之令聿修獻歲之儀玉帛來同仰一人之有

張大司空集卷之二  
慶冠裳萃止祝 聖壽于無疆彤庭凝祥霽之氤氲  
紫禁迓 玄庥之駢疊嘉時伊始 景命益隆卽  
今之三十二年茂膺 寶錄後此而千億萬歲永握  
珥晷協氣薰蒸囿群生于壽域條風鼓舞躋品彙于  
春臺

賀元旦表四

日啓三陽仰昌時之茂對陽回六合忻大運之維新  
喜溢臣工懽騰夷夏恭惟 皇上心涵太始德邁古  
初欽若 昊天百神歆而受職懋昭 皇極四海暢  
以同風粲然禮備樂和久矣治隆化洽惟茲 正旦

載啓佳辰誕陳元會之儀茂衍履端之慶 天臨紫  
極瞻瑞靄之氤氲氣轉洪鈞覺 玄風之清穆蓋惟  
體元居正是宜申命用休慶集 一人祥開萬物肇  
寶曆三十一年之首祚綿 理景億千萬載之丕基  
臣等職忝成均躬逢 明盛菁莪樂育咸仰賴于生  
成栢葉稱觴庶少伸于頌禱伏願 保泰以臨天下  
處豐而宜日中新以又新同戴堯天之浩蕩旦而復  
旦永瞻舜日之光華

賀元旦表五

四始履端萬寓啓維新之運 三元首祚兩儀協交



泰之期青陽乘震以發生 紫極應乾而納佑神人  
胥慶朝野騰懽恭惟 皇上道邁羲軒德隆 堯舜  
凝神清穆玄同象帝之先建極中和敬授夏時之正  
撫五辰而熙績齊七政以當天雨暘燠寒育物功昭  
于茂對禮樂刑政體元化備于裁成國常泰年屢豐  
玄機默運外威嚴內順治 神武丕揚祿位名壽  
之兼全信巍巍而莫及功業文章之特盛有蕩蕩而  
難名茲者序正孟陬儀陳元會祥開鳳曆屆三十二  
載之元懽動龍墀祝億萬千年之永仙冀十業擁瑞  
璽千穹堦鈞樂九成度頌聲于合殿 皇仁隨陽澤

而汪濊韶光協和氣以昭流是誠  天眷之益隆大  
慰民心之仰戴臣等叨塵密勿夙荷生成念歲月之  
旣多感  寵恩之愈厚舞同鰲抃頌益嵩呼伏願寶  
筭  天齊瑤畷地廣備箕箒之五福永登萬物于春  
臺正泰階之六符長納八荒于壽域

賀元旦表六

乾坤交泰覩  聖治之維新海宇同春仰  天休之  
滋至臣工胥悅遐邇交懽恭惟  皇上受命溥將  
凝神清穆德合四時之運學開千聖之傳禮樂興刑  
罰中政教畢張寒暑節風雨時陰陽無忒納庶民于

皇極 升斯世于大猷蓋道久而化成故風行而  
俗美茲維端月三朔肇臨爰啓昌辰百祥率至禮陳  
元會適當肆 覲之期慶洽寰區咸切朝宗之念瞻  
威顏于咫尺肅環珮以趨跄栢酒稱觴椒花獻頌氤  
氲五色雲光遙擁乎蓬萊裊娜千枝春意先傳于御  
柳忻和風之布暖見化日之舒長道與時亨儼僖遊  
于舜旦人同春育惟敬祝于堯年臣等幸際熙朝恭  
逢 令節 恩荷陽和之被報懷葵藿之私伏  
乾元發育離照重明國泰 逢宗社享萬年之慶  
寧外謐華夷同一統之春

賀元旦表七

律宣太簇陽固六合之春星紀孟陬氣轉三朝之旦  
皇運與天行共泰歲華偕帝載咸熙慶洽含生  
懽騰率土恭惟皇上道符冲漠治邁古初育物對  
時四海普霑乎允澤體元居正萬幾獨斷于乾剛  
禮樂備而聲教彰府事治而詠歌作風塵息警神功  
允莫乎堯禹雨雪應祈聖政屢書于玉版仁協  
唐堯之大蕩蕩乎難名德同周文之純嘽嘽焉不已  
屬化成于久道適節屆于穀端肇七十二候之麻徵  
析億千萬年之景琬推神筴而統天握紀啓象魏

而布令憲和紫殿爐烟暖合條風之習習彤庭燎火  
光迎旭日之輝輝洪禧茂介於維新戢穀丕昭乎  
更始衣冠萬國拱北極以來王閭闔千官稱南山而  
上壽昔華封之祝事僅見于一方而塗山之朝時  
非值乎元會乃今承九業重熙之運當二儀交泰  
之辰得遐邇之懽心戴元正之盛典誠考諸傳紀而  
未之前聞者也臣等恭趨丹禁喜覩青陽仰  
六龍之時乘隨百獸以率舞伏願玄靈篤眎黃  
輿薦祥納宇宙於同仁綏華夷於一統三十年而  
又爲世永私撫世之模八千歲而始爲春益進

長春之祥

新刻張太岳先生文集卷二十一

江陵 叔大張居正 著

後學 曾可前 校

高以儉

答列卿毛介川

今之士大夫冠纓相摩踵足相接一時號爲交游者  
蓋不少矣然而未必皆可與之言也可與之言矣猶  
未可與之微言也可與之微言矣猶未可與之不言  
也若夫目擊而道存無心而冥解者若僕與翁蓋庶  
幾焉僕每一相見卽頽然喏然若遊太虛而涉廣漠

者不知翁之洗我以德耶豈亦僕之鄙樸任率有當於翁之心相薰相忘莫知所以然而然耶旌麾漸遠悵望爲勞惟此一段精神相期於形神之外者則固非地所能限耳承翰教瞻戀彌增南中會楚侗丈幸言僕與翁所以相與者如此

答南中題學御史耿楚侗

去冬賀道長至得翰教會有大行之事哀悰卒卒不及裁答進香使至伏承訊及感慰別論云云俱盡事理其間有未及舉行者推公之意次第行之僕以淺薄驟冒非分日夕惶惶罔知攸措思所以辭 主恩

而慰知己者惟虛平此心不敢向人間作好惡耳  
於轉旋之機未免有迹非心是之判士大夫責望素  
深或不能盡如其意然亦不暇顧矣高明以爲何如  
荅中丞洪芳洲

鄙人辱公之愛有年矣頃者因緣際會驟涉崇階  
聖主念甘盤之舊不棄簪履元翁垂接引之慈無遺  
管蒯深惟謏薄任過其才夙夜念之若爲稱塞惟當  
堅平生經綆之節竭一念縷縷之忠期不愧於名教  
不負於知己耳然切蒯之益實在同心將伯助予幸  
毋遐棄熊廉憲旋草草附謝厚惠慙不敢當謹用和



璧知公素諒其狂直不罪也

答樞督魏確菴

承示邊圖既詳且覈劄勦之略於此亦微見其緒矣  
敬服敬服近聞虜欲西犯今士馬之力萃於薊矣如  
不得志必將東逞願公嚴備之

答宗伯董潯陽

僕以謫薄獲依日月之末光復從末階驟躋三事束  
橈作柱用荷爲梁庸愚之人猶將嗤之况高明耆碩  
如翁者乎乃辱不鄙遠賜問賀獎借過情重增其愧  
至勉僕以作者之事尤不敢當古人以行誼文章兼

顯於時者世不多見明興二百餘年名世之輔專門  
之彥凡幾作矣而一代文章猶未能追踪古昔乃欲  
責之於椎魯人詎能耶若使以其硜硜小人之守慙  
捲納誨之心朝夕俟褒職有缺時用一縷補之以仰  
客隆遇而免於罪戾或庶幾耳冉氏云如其禮樂以  
俟君子惟翁學綜墳典冠絕等倫海內士孰不望之  
以爲宗主誦之以爲軌範今 天子誠不欲興禮樂  
則已如欲稽古禮文之事以潤色鴻業發揮典籍則  
舍翁將何之焉願努力自愛弓旌之賁當有日也令  
郎奇才久屈誠有遺珠之嘆茲旋草草附謝辱惠通

輿愧不敢當謹領綾絹二事餘壁上別具侑柬統惟  
鑒原

答雲南巡撫陳見吾

沐國公者素不相知自去年以來屢次寄書俱有重  
禮僕屢竣却之并其書亦未敢拆恐此等事皆其從  
人所爲其主不知也文會間語次煩爲道鄙意其諸  
未受禮儀亦宜稽查毋爲乾歿再惟世臣之道但能  
守法安靖自可長保爵祿廣交行賂徒爲驅騙者之  
資耳况今朝廷清明倖途斷絕如有違犯雖親不  
宥天威赫赫誰敢干之以貨求全恐不能也渠若

有知亦可以此警之亦誘人爲善之一端也伏惟留  
意餘無言

答兩廣督撫張元洲

廣事不意披猖至此諸將所領兵船亦不甚少乃見  
賊不一交鋒輒望風奔北何耶將不得人軍令不振  
雖有兵食成功亦難故繫四敗將於闕下不重懲之  
無以示警諸凡調處兵食事宜似宜少破常格乃克  
有濟公苦有高見宜亟陳本兵當爲議處也元老去  
百務助勦冗不多及

答少司馬楊二山

比來士習人情漸落晚宋窠臼中有識者雖心憂之而不敢言僕不揣淺陋妄有所陳猥辱高明特垂鑒獎感謝感謝賈生有言使管子而愚人也則可使管子而少知治體則豈不爲之寒心哉今遇清明之朝當改絃之會而不相與勵翼協力共圖實事猶欲守故轍騫虛詞則是天下之事終無可爲之時矣未教謂自今祇論事功以爲黜陟凡稱清稱高談玄及議論無實者一切斥之不顧旨哉旨哉言乎

答中丞孫淮海

比者冒昧妄有論建辱獎譽過情深以爲愧大厦之

成非一木之幹僕旣已唱之矣尚賴一時賢士同心  
和之庶克有濟柰何人心玩愒已久溺於故常蔽於  
私意雖心知其當然而終不能踴躍以趨赴也今惟  
積此真意漸次薰蒸假以一二年度可少變但僕以  
病軀久欲棄人間事恐不能從容以需之耳辱道誼  
知已輒盡其愚

與參議高廉泉

前有小柬托趙太府人將致諒登記室張文簡公繼  
夫人祭葬已經該科參駁僕懇之於禮曹始得題覆  
如例蓋其中亦稍有未順故耳張使回附此諸惟鑒

原

答張中翰仰峰

感文至始知有太夫人之變悽感悽感卹典該科以  
例欠合叅駁區區懇於部中始得之使旋附復厚惠  
槩不敢領輒用歸璧統惟 原

答司馬楊二山

今秋邊烽無警亭障完固公之功當爲諸鎮之冠矣  
徐君條議馬政鑿鑿可行而公止據原議輒與轉聞  
略無增損視人之善如己之善此尤見公之襟度恢  
濶非世之沾沾有己者可比也敬服敬服

答廣西熊巡撫

辱翰教知廣事已有次第山賊多所斬獲公之威望已著盪定可預睹矣但聞該省軍儲甚乏昨與部議量發帑銀以濟之往年剿閩寇發銀二十萬今廣中應解錢糧已奏留而川浙又可責償原貸今擬半閩中之數似宜足用期使炎蒸之民知朝廷軫念之殷不以遐遠而或遺也頃科中建論欲更置督府代者尚未定先此復

答中丞梁鳴泉

恭喜今望益隆崇階伊邇欣慰之悰良不可喻近來



士習人情似覺稍異於昔浮議漸省實意漸孚鄙人  
疏發其端而太宰公力助之太平之休庶幾可望但  
不知後來何如耳

答御史顧公曰唯

辱揭示領悉惟公端亮之節冠於臺表比者一二注  
措尤協輿情太阿發矂虛以運之遊刃有餘地矣近  
來士習人情似覺稍異於昔李石翁寬和沈靜幹握  
機衡僕亦竭其駑鈍以共相疏附詩所謂伯氏吹埙  
仲氏吹箎者或庶幾焉

答馬總兵

今歲秋防無警貴鎮又有此奇功足下赤心報國力  
冠諸邊於僕亦有光矣幸努力功名朝廷自有大  
爵賞一切事體不必過慮如有難處之事一一說來  
僕自有處

答薊撫劉北川

今歲秋防無警雖國家之福然亦督撫諸公先聲  
之所震疊也欣慰欣慰承示易將請兵數事皆於邊  
備有裨容與本兵卽爲議處薊鎮有沈痼之疾非旦  
夕可療者惟本之以實心鎮之以沈靜審處機宜弛  
張並用需以歲月庶可成功顧前此爲浮議所眩使

當事者不得展其所長私心每憤恨之數月以來覺  
士習人情少異於昔實意潛孚浮言漸熄來教所謂  
牽制譏讒者自今可毋慮矣望努力功名以慰注想  
臧帥才略在今諸將中誠爲希有幸公以道眼觀之  
答河道巡撫翁見海

僕不肖切抱敬賢之心如公之高節弘猷則尤私心  
所嚮慕者理漕特借以爲簡卑之地不久勞也辱示  
疏沁道衛分渚上源誠爲急務但渠初成勢難再舉  
俟休養生息二三年後物力稍舒當卽計之若此圖  
獲就實 國家萬世之利也

答廣西熊巡撫

往者冒昧妄有所陳誠激於時弊不得已也公不以爲狂且愚而辱賞許之感甚感甚詩不云乎唱予和汝僕旣唱之矣尚賴中外諸賢同心共和庶克有濟不然將並鄙言亦屬之議論矣海賊據閩中報謂已盪盡恐未必實然要之其勢已敗殄滅有期矣

答南祭酒姜鳳阿

聞公振鐸南雍敘先行實卽大疏所陳亦可見其梗槩而推轂處士尤於風教有裨已下部議覆矣

與薊遼總督譚二華

前聞道體小違和無任懸念今想勿藥矣近日處分  
戚帥誠出下策然非得已也頃會霍司馬云公本欲  
論郭琥則屬者之舉似亦與高見懸符且事權歸一  
法令易行兵不遠索浮議自省假之以便宜需之以  
歲月薊鎮之事亦未必不可振也但以總理體面比  
之鎮守爲優今旣易銜則上下承接自有常分用之  
雖重而禮則少損矣昨本兵題覆慮不及此不知公  
議疏中亦可爲一處否如不可處則於常禮之外少  
加優借以鼓舞之又本兵疏以巡關御史監軍此言  
大誤盖戚帥之請監軍謂於本鎮之外別練兵五萬

也今既爲鎮守有地方之責則巡關御史何事不可  
督察又何必更爲監軍名色以撓之哉公於議疏中  
幸婉詞以破其說至於射打一事極爲虛文其中情  
弊可哂可恨今但以訓練之實責之戚帥如有不効  
巡關御史得論劾之固不必襲此故套虛文爲也又  
鄙意謂南兵既不可取鎮兵或不足數必須聽其召  
募庶可充伍且訓練若成則老弱可以漸汰援兵可  
以漸減又不苦於供億之繁矣兵不貴多而貴精李  
抱真在潯潞以二萬人雄視山東豈在衆哉

又

戚帥以總理改總兵誠爲貶損綠渠當僕以書相問之時不急以此意告我而本兵又倉卒題覆故處之未盡其宜然及今尚可爲也望公於議疏中委曲爲言不但體面降抑爲下所輕且督撫標兵皆欲付之訓練若不兼總理何以行便乞特致一書於閣中二公及虞坡思齋僕得從中贊之更易爲力也倘得如意當於勅書中增之其開防當改鑄矣昨議增築敵臺實設險守要之長策本兵卽擬覆行但據大疏謂一臺須五十人守之則千臺當五萬人矣不知此五萬人者卽以擺守者聚而守之乎抑別有增益乎

聚則乘垣者無人增則見兵止有此數不知又當何處也又四面周廣才一丈二尺雖是收頂之式度其根脚當亦不過倍此數耳以五十人周旋於內一切守禦之具與士卒衣糧薪水之類充牣其中無乃太狹乎便中仍望見教萬萬山東民兵徒有征戍之勞而無戰守之益若折解工食銀兩則一歲中卽可得十餘萬以此十餘萬之貲召募土著精壯之人便可得勝兵五六千比之千里遣戍功相萬矣僕久懷此意未有以發公熟計其便再疏言之何如凡僕所白皆密要語故不敢令人代書極知草草



答某巡撫

辱示大疏俱於邊屯切要已下所司次第題覆公以正氣直道董正官邪緣此見嫉亦誠有之幸太宰知公最深三至不惑萬無足慮

答閩中巡撫

廣賊猖狂蔓延閩地當事者張皇奏捷本兵據揭題復遽行賞賚俱爲大謬辱示大疏讀之使人憤恨頃該科亦以爲言向後當別有處分也差人旋草草附復外新刻文苑英華有便幸惠寄一部冗不多及

答潮廣李布政

遠辱華翰感荷厚情大惠槩不敢領輒附差人璧上  
趙守自處愼抑不敢遽抗禮於諸公昨銓部訪知其  
未履任而卽繳憑故行查耳今聞兩院已有定論  
上下相安實地方之幸也承諭及并此以復餘惟鑒  
原

答奉常羅月岩

往令弟春元及鎮山公差人茲因洞岩至三辱華翰  
之及感悉垂念至意近來士習人情紀綱法度似覺  
稍異於督實自小疏發之然忌我者亦自此始矣念  
旣已身荷重任義當直道正言期上不負 天子下

不負所學遑恤其他執事久困流言今公論稍定賜環有期矣

答憲長宋陽山

自丈從閩中解歸久不聞問然此心實不能一日忘也比者激於時弊不得已妄有所陳近來士習人情紀綱法度似覺有異於昔實自小疏發之然以公之亮飾弘才久困流言僕不能刷而振之蔽賢之咎必不能追矣別楮所云徃亦略聞其槩行當與李石老圖解之譜帙實已遺失有便再寄一通當踐宿諾也

與蘄遼總督

薊中事公所措畫咸極精當本兵一一題覆初亦有一二異同之論僕據事理譬解之今皆帖然矣戚帥復總理不載議中諒公有難言者已具部疏擬特旨行之卽有言者無足慮矣但乞諭意戚帥努力功名以答群望僕亦與有光焉

與兩廣總督

賊起已有端公不待其潰裂而早圖之策之得者也此中是非甚明無煩自白今南方之事一以託公幸益殫忠猷以慰輿望乞身之舉非所敢聞

與廣西巡撫

惠州之變傳聞甚駭廣事猖披至此日夕懷憂帶川至幸與之熟計積弊之餘非破格整頓恐不能濟有當言者宜卽疏聞僕當從中力贊之也新任陳憲長名瑞者頗練南中事公試與籌之何如

寄太宰吳望湖

知賢而不能薦去而不能留孔子所謂竊位者也公雖欲遂其高志僕輩將何以追竊位之譏哉其懇留公者不獨以爲國家亦以自爲也

與薊遼督撫

薊事仗公雄略有漸振之勢慰甚入衛之師疲於奔

命人人以爲不便然而終不可裁者勢誠不能也大  
疏已明無容復議戚帥不知近日舉動何如折節以  
下士夫省文以期實效坦懷以合睽貳正已以振威  
稜乃渠今日最切務也相見幸一勉之

與兩廣熊督撫

惠州之變或言城已陷矣遊聲噂嚅至不可聞僕日  
夕以此爲憂頃得捷音無任欣慰至於不自爲功而  
歸之虔鎮尤見無我至公然公之功亦自不容掩也  
陸寇旣除自此可專意海上帶川至幸與之熟計事  
有當言者宜卽疏聞僕當從中力贊之也新任東憲

長名瑞者頗練南中事試與籌之何如

答奉常劉小魯

辱翰示知道從已至留都慰慰公雅致高懷僕所深  
諒昨曾見臺告歸提督有缺銓司欲擬公調補僕再  
三力止之蓋知公之不樂驟徙用成高致焉有便可  
致書於選君謝且止焉可也區區淺薄無補於時欲  
去不能欲留不可又值老母南歸情懷愈惡人旋附  
此

答雲南巡撫陳見吾

遠辱翰貺感荷厚情滇事部覆具如尊指但通道馬

湖蜀中士大夫咸以爲未便俟其論定當有處也

與薊遼督撫

承示虜賊聚兵及三路入犯恐屬未的何者虜若大舉必不止於八千一萬審欲大舉亦必匿形歛翼豈肯以三路之說明告於人且今天氣漸熱虜馬已弱零騎往來難保必無若欲深入恐非其時雖然不可不過爲之防也已告於本兵俟有的報卽行調遣僕近訪得薊鎮軍糧有開支於一二百里之外者士卒甚以爲苦夫以數口之家仰給於一石之粟支放不時斗斛不足而又使之候支於數百里之外往返道



路顧倩員戴費將誰出是名雖一石其實不過八九  
斗止矣况近日又有撫賞採柴等項名色頗出其中  
如是欲士皆飽食折衝禦侮能乎聞舊制各區隨在  
皆有倉口該官守支今各倉廢或頗圯壞而其制猶  
存其官猶在獨不可併廢修理就近坐派乎此事不  
必疏請但與管糧郎中一計處可也

與薊遼督撫

向有人告僕云戚帥求望太過志意太侈雖公亦甚  
苦之故僕以爲問今奉來教知昔之所快快者徒以  
削其總理舊衙耳今旣力爲光復更將何求近屢得

渠稟帖極爲感奮願務收拾人心漸圖實事仍望公  
時時教督之雖然僕何私於戚哉獨以此輩國之  
爪牙不少優假無以得其死力今西北諸將如趙馬  
輩僕亦曲意厚撫之凡皆以爲國家耳縷縷之忠  
惟天可鑒若此輩不爲國家盡力是負天矣郭琬  
之賢誠如來教卽召至面諭以公相知之意嗟乎人  
誠難知知人亦未易也

與應天龐巡撫

辱示條議鑿鑿可行敬服敬服國用出納之數計  
部每季具題歲終又總報雖未會計成錄而其數亦

明但 朝廷未嘗加之意耳今邊費日增計每歲所  
入之數尚少銀百四十餘萬兩民力已竭費出無由  
日夜憂之不知所出奈何奈何公峻節清望冠冕一  
時頃大察雖有一二欲肆流言而竟無間可入精  
在治百鍊愈光願公自信益堅勿起疑障也

與湖廣巡撫

屢辱翰示已一一具復近聞施州兵備決當裁革乃  
李僉憲亦自以爲當裁則輿論可知矣部中已停缺  
不補幸早具議以便題覆

答湖廣雷巡按

辱翰示知道從已臨楚地無任欣慰茲有一事請教  
施州兵備舊無此官偶以隣境小寇謾爾增設今地  
方事寧此爲剩員矣夫官多民擾供億費煩姑未敢  
論且分巡荆南道原控制蜀之瞿塘如得其人何事  
不舉乃舍其專職而另設官於事體便乎否也今李  
愈憲已陞銓部停缺未補俟兩院具題卽議省矣惟  
裁之幸甚

與薊鎮督撫

西北邊患無大於板汭者 朝廷宵旰西顧屢屢諭  
問僕輩謬膺重寄 主憂臣辱不敢不以爲慮但寄

彼量已圖之甚艱又前奉翰教謂道遠隔河難於進  
取妙筭蓋籌之已熟卽趙帥亦自謂難圖故不敢復  
言取之之計獨招降一節元年 詔書如李自馨等  
明許其歸順又本兵題准賞格及近日見行事例皆  
布之遐邇傳之虜中非所謂始禍而開釁也昨偶因  
趙帥以李自馨手帖見寄竊以爲自馨等來歸之意  
其誠僞固未可知但 朝廷有詔招降則又不可設  
然不爲之所故面付趙帥使密圖之且戒之曰受降  
如受敵不可輕忽蓋正恐其輕舉妄動而墮奸人之  
計也茲奉來教無任惶悚閫外之事書生不敢妄談

亦不敢遙制惟公熟計之若果出於至誠因其來歸而撫之惟命審其不誠而閉關以謝之亦惟命惟求以便於國家而已

與司成胡劍西

別來不覺再檢眼前世局凡幾變矣平生膠漆或化爲戈矛大道康莊皆鞠爲榛莽其中情態難以盡言數月以來委曲幹旋乃得寧帖然其爲力也勞而其心亦甚苦矣知己遼邈誰與晤言悵悵丈遠避流言淹棲林壑大察之後公論昭然諒非久必有處也旋當爲丈圖之

答歐少卿

辱翰示領悉時屬休明衆賢勵翼方欲蒐遺佚於巖  
穴以共圖治理况高節雅望如公者可使之淹留林  
壑耶大疏部已案候雅志終不能遂幸惠然肯來以  
慰鄙念

答徐巡撫

聞中捷報在蔣伯清失事之先言者不察遂爲訾詆  
比來公議甚明 朝廷方精覈名實以勸有功卽謫  
書盈篋終不爲動也願公自信毋慮

答王巡按

辱翰示領悉紀功之差鄙意甚不欲之乃貴院堂公持之必行而同事者主其說又卽以畀公皆非事體非公心也待地方稍寧生當獨奏省之

答凌叅政

辱示條議鑿可底行容與當事者酌處之戚之聲名雖著於南土然觀其才智似亦非泥於一局而不知變者且旣已被鎮守之命有封疆之責豈宜別有注畫乎今人方以此窺戚之釁恐不知者又將以爲口實也公如愛戚惟調適衆情消弭浮議使之得少展布卽有裨於國家多矣



答施兵憲

辱示江漢地圖公軫念民患加惠荆人甚厚甚厚堤  
工告成地方百世之利也僕爲邑子誼當紀述重以  
汝臬公之命豈敢以不文辭時下薄冗稍俟從容卽  
勉成請教

與薊鎮巡撫

近來邊臣人思奮勵而宣大二鎮督撫將領尤爲得  
人僕以淺薄謬膺重寄其於該鎮之事苦心積慮雖  
寢食未嘗忘也奈何人心不同議論不一如馬趙二  
帥去歲出塞之功實數年僅見卽破格優賚豈足爲

過而人猶有議其功微賞厚者本兵遂愾縮疑畏而不敢爲之主其掩春防之功抑王公之請咸以是耳一二年來言者率云責實責實矣而又不明賞罰以勵之則人孰肯冒死犯難爲國家用哉辱教容與本兵議之督撫寬洪持重王公明達敏練馬之沈勇趙之才氣皆僕素所敬信者文武輯睦事乃克濟不知雲中事體得如宜錮否也

與魏巡撫

過虜之功大於斬獲往者本兵消於羣議功賞不明乃僕輩亦有過焉惶愧惶愧茲者斬馘至百數十級

近年以來所僅見者文吏又可以法繩之耶俟覈勘  
至當請 旨優錄茲先行薄賚耳

與兩廣督撫

惠州之戰非贛兵往援則廣事不知今作何狀矣自  
公鎮黔之後巢賊喙先懾伏不敢動刀降封亦藉其  
威望用成大功嗟乎圖治之要豈不在用人哉聞捷  
不勝喜慰

答薊撫朱龍岡

雲中開府近鮮其人借公之重移而鎮之實出於李  
石翁與僕之意方欲爲 國家論才故未遑爲交游

擇地也願益展弘猷以副羣望趙帥才勇公所素知  
重鎮大將關係不小望公之垂盼也

與荊州趙知府汝泉

老母舍弟回及西石家人去兩啟馳候諒俱入覽  
頑奴不知已擒獲追併否望速爲處分翹俟翹俟新  
任劉尹志行甚佳且老成有幹局必堪厥職但縣事  
廢馳已久釐振似當以漸望公曲賜教掖假以歲月  
俾得從容料理庶可責其治効也

答朱巡撫

辱示條議皆鑒可底行至於罪人就近發戍事尤足

兵良策此不獨貴治卽近邊諸省皆可行也

與薊遼督撫王鑑川

承諭失事官軍不必提問徑付軍門處治知公微意  
欲借此以申軍令也卽諭意本兵必如所請近巡關  
訪拏南兵聞其事已往且經戚帥重治何又爲苛求  
如此聞該道誤信一二屬官之譖多方羅織務在挫  
辱之使不得有爲果爾薊事終無可振之日矣望公  
與撫臺內爲一處庶開外之事得少展布也

答兩廣總督劉帶川

伏讀大疏賊已在月中矣但廣中人情多變將領利

於養寇奸民樂於從賊此遭寇所以得遊魂海上也  
願公留意焉所請已如命借發南部銀五萬兩計先  
後奏留及內帑所發各省所償不下四十餘萬仗  
公雄畧似亦足以辦此矣如再不敷又當措處羣情  
嗷嗷佇聞凱捷以舒宵旰之憂

答浙撫谷近滄

兩承翰示領悉武備弛而財用乏文武將吏虛文塞  
責此不獨浙中爲然朝廷方欲綜覈名實以興太  
平奈何積習成風因循難振此在司風紀者一加之  
意耳頃聞粵驛騷患將及浙預防之策兵餉爲急乃

往者撫臺每一人至卽奏請蠲貸徒爲節省之名不思幹濟之實脫一旦有急帑藏空匱當其時能不徵派於民乎此務虛名而貽實禍者也昨敝鄉周道長者亦曾以此告之須兩院同心籌畫事乃克濟也

答督學曾確菴

承示大閱事誠爲要論今武備廢弛如此不及今圖之則衰宋之禍殆將不遠僕於此事頗殫心力乃昨南科有疏又以此非急務今朝野喁喁方謂朝廷舉希曠之典九邊將士亦莫不扼腕而思奮而此君乃獨持異議人之識見相去豈不遠哉選貢事不

知各郡已徧試否此與歲貢不同但求得僞不必取  
盈近例甚嚴昨楚中已黜四人矣若諸郡尚有未起  
送者幸嚴加甄別合諸郡之士而試之優劣乃見惟  
其人不惟其地可也

答陝撫王鑑川

關西三獻捷音斬馘逾百實數年所僅見者仗公雄  
畧分陝得人 朝廷無復西顧之憂今誠欲興文武  
之業豈不在擇任賢僑哉功高而賚薄尚當有待也

與楚學憲胡廬山

敝省文宗借重高賢命下之日輿論稱允惟公遵養



已久亦宜及時效用幸早成行以慰羣望昔也倦翼  
知還今也無心出岫時行時止無意必焉可也

與憲使羅月岩

令舅翁轉示華翰雅愛至情藹然盈楮僕以寡昧謬  
膺重寄一念惓惓許國之忱實不敢上負明時下負  
所學昨者疏陳萬不得已然知者以我爲患不知者  
將爲炫已而先人也其苦心處惟鎮山公知之難以  
盡言此者之議雖爲極枉然猶嫌舊怨亦借此而宣  
泄比已借重東省驂騑屬路從此皆康莊矣願早戒  
行以慰鄙望

答福建徐巡撫

顧監丞至得所惠文苑英華一部感悉厚情閩船開  
已出洋廣中亦漸有次第計海醜不日盪定矣夾剿  
雖事關兩省而公之勞勩爲多佇聽捷音以慰輿望  
答南太宰吳望湖

大疏簡切溫厚深得大臣告君之體而召對一節尤  
爲當今急務此事僕輩亦屢次入告未荷允行  
若此關不啟治平未可望也奈何奈何

答魏巡撫

往與李選郎談當今人物語及於公謾有云云誠望

公之切爲慮之深故不覺其言之過耳乃公不以爲罪辱垂虛納惶愧惶愧鹹場之捷本屬奇功本兵守文復欲行勘俟勘至當另議優擢往者薄賚豈足酬哉

答吳操江

比見浙中亦有警報吳越接壤桑土之防不得不預大疏本兵已卽具覆又借重暫行撫院事東南有賴矣

答薊遼劉督撫

辱示麾下暫駐廣慶俟兵船俱集而後乘之所謂始

如處女敵人開戶者也賊雖未破吾已見勝徵矣選調浙兵卽具覆允行但浙中議論苦於調發召募之擾倘五千人足辦此事似不必復求更代也兵難遣度惟公裁之

答司知縣

兩辱華翰俱悉但九江胡兵憲原未入京區區素不識其人實亦未嘗托之不敢市德於執事恐爲人所誑也近來外間盜竊名字者甚多後有此等事宜細加審覈

答荊州趙知府

頑奴犯法致煩尊慮惶愧不可言據招承之詞似已明實今欲正法必申呈兩院轉達乃事體也但當時發覺此事止令錦衣衛緝拏各棍原未送法司問理蓋以所騙之人乃一士夫之子以愚被欺若欲送則受財與請求之人於例俱當發遣已既不能禁戢其下又因而連累他人父子前程心有所不安耳今止二棍監在錦衣衛待此歸結竊意謂不必申呈兩院但求一印信揭帖并招詞原贓差人徑送與僕卽將來文贓發與該衛立案歸結二棍亦就衛中處治免送法司也此既不傷潘氏父子前程亦不經由許

多官司留此形迹也僕以淺薄謬膺重任日夕檢點  
此身思以率先百辟而頑奴乃敢故犯憲條孽本自  
作死不爲枉幸爲速除之以警其餘揭帖中明開已  
監故可也其贓銀必解來者蓋以二棍見其口詞贓  
物乃肯輸服且僕之心迹亦俟此而後明耳今各省  
撫院兩司印信關防揭帖論公事者甚多固不拘於  
公移體式也鄙事煩瑣屢瀆尊嚴愧悚無已

與分宜尹

聞故相嚴公已葬公陰德及於枯骨矣使死而知也  
當何如其爲報哉

與劉進士禹謨

別後一屨記問感荷厚情兒輩得奉教於門下幸甚  
比來頗知奮勵不敢廢業謝君選期當在八月度其  
名次當得內除但既授職則自有官守之責不得專  
精於教督矣竊思執事大事既襄讀禮有暇且憶前  
別時亦曾有接館之約不知終愛否便中專懇幸惟  
亮之

答凌叅政洋山

惟公宿望宏猷久淹藩臬旦夕且當有大用於左右  
雅志高懷決不能遂也示蒞事咸中機宜譚公威

帥殫忠効實人罕知者賴公委曲調護裨益弘多節  
得西報虜酋尚未回巢東虜勢孤或亦不能大舉若  
隘要處墩臺已就秋防詎保無虞需以一二年守備  
漸修士氣稍振即可議戰矣奈何人心不同好生異  
議阻壞成事殊可恨耳

答閩撫涂任齋

海賊挾倭奴爲患閩中之訊欲牽我師仗公雄略咸  
就殲夷從此併力海上盪定之期匪朝伊夕矣慰甚  
慰甚懋賞酬功 朝廷自有異典孰得而掩之哉

答中丞孫淮海



辱惠佳刻略讀數種皆入玄造與含菁咀華且其議論不詭於聖人向也吾見公之貌而已今乃得窺其深矣蘓氏有言千金之富卿相之貴苟非天之所與求一言之幾乎道不可得也公以涉壯之年早窺道域天所與也願勉旃自愛歸見令叔慮吾證以山中所得何如恐當遠遯阿戎矣

答中丞李沽渠

辱華翰諗麾從已臨節鎮慰慰雲中迫鄰虜境比年主將非人邊備久弛近得趙帥稍覺改觀公資其雄略授以勝算虜不足慮矣

答漕河督撫

淮徐因敵已極豈堪重罹大災惟幸新渠安流漕艘  
無恙然吾元元之衆與苦甚矣賴公經畫有方勞來  
安集得以少舒 朝廷南顧之憂慰甚慰甚大疏一  
一覆行

答中丞谷近滄

近來考課不精吏治日敝去歲曾一疏陳之而人皆  
溺於故常務爲姑息以悅下今實行者惟見公之論  
先尹而已方今幹蠱之時非加意綜覈不足以振敝  
維風公之此舉其有裨於治道不淺敬服敬服前所

控者不知其人已獲否便中附及

答總督譚二華論任事籌邊

築臺守險可以遠哨望運矢石勢有建瓴之便士無  
露宿之虞以逸待勞爲不可勝乃策之最得者其利  
害長短亦不待智者而後知奈何近間一種幸災樂  
禍之人妬人有功阻人成事好爲異說以淆亂國  
是又幸天下之有事而欲以信其言聞者不察從而  
和之數月紛紛盈耳僕隨事破妄因機解惑舌幾欲  
敝而唇幾欲焦矣近來稍稍寧帖昨巡關出亦曾與  
之極言其利害又故以他事獎之而使之知所嚮往

自此之後異議者諒無以鼓其喙矣公之忠赤勞勩人雖不盡知我祖宗在天之靈必陰鑒之願堅持此心保無他虞僕在此一日必爲國家肩一日之事今人心不同趨向靡定百爾委曲調御僅得少濟終無能大有建明其苦心極力處有不敢爲公告者亦惟仰祈我祖宗在天之靈鑒此欸欸耳西邊屢有偵報虜酋未回目前或可無事再假一春寧謐則緊要墩臺皆已竣役即可議減客兵一枝然此須自公發之爲妙且看明春事勢何如再作商量也大疏所陳計慮深遠規模閎闊非爭逐於刀錐者可望已

下部議覆但人情玩愒已久雖有良法美意不肯着實舉行一切皆成故紙殊可恨也當此幹蠱之時不少行總覈之政惡能振之哉戚帥久不聞問不知比來何如辱翰示之及謾爾具復不悉欲言

答兩廣總督熊近湖論廣寇

數年劇賊一旦就擒仗公雄略收此奇績斯朝廷付托得人之效也功高賞懋國家自有彝典本兵方按故事奏凱論功嗣容專賀竊以爲滅賊固難善後尤難蓋廣之勛勦非一日矣數年以來憂在曾賊耳未遑他圖也今鯨醜雖已就戮而奸民反側者尚

懷觀望山寇陸梁者伺我疲勞海防久廢法紀未張  
吏不恤民驅而爲盜此皆釀禍之根未可遂謂寧帖  
也且張璉擒而吳平繼之吳平殲而曾一本繼之往  
事夫策可爲炯鑒爲今之計似宜乘戰勝之餘威藉  
兵餉之少裕急將海防事宜嚴加整飾如林道乾軍  
旣爲良民便當遵吾約束渙其羣黨釐其宿弊如懷  
疑貳卽可名之爲賊因而除之仍當於沿海一帶分  
區設寨修飾兵船嚴申海禁又廣中原題設六水寨  
今宜選諳習舟師分任責成至於山寇乃坐守虜耳  
勝兵往加勢如破竹亦宜殲其渠魁後乃可議招撫

區畫已定然後簡汰有司一意拊輯所謂乘威之後以行惠則惠尊而民悅此數世之利若狃於一勝遂謂無事而姑息以求安竊恐亂本不除餘毒再作終當復勞尊慮耳萬里之外事難遙度第以管閔質之左右公其採而行之幸甚

### 答楊兵憲

近邊兵憲待次撫臺比者借重寔遴選也願益展猷爲以需崇簡蒞事不振久矣頃雖加意整飾蔑聞實效弊在人心不一論議煩多將令不行士氣難作此雖督將領之責然司道實分任其事幸公留意焉

答薊鎮戚總兵

廣事自區區力主夾剿之議及請發帑銀先治海賊諸事人皆未以爲然今偶得成功幸也但善後之圖全在督撫頃所示者悉中機宜已卽授之於熊巡撫矣

與漕河督撫

敝省改折漕糧三萬石原因荊州左衛移調該衛運船灑派江西無軍無船其勢不得不行改折非暫因災傷蠲免者比也昨該部不查緣由議復本色竊以爲欲復本色必先造船又議撥軍今湖廣一



省軍衛除邊方守禦外大抵皆爲運卒矣今欲增撥將何所出造船旣費不貲撥軍重行勞擾而所復本色不過三萬石况京軍月糧近亦本折兼支則改折事體亦爲兩便又何必拘拘以復本色爲哉今當下貴衙門查議惟公留意熟計之幸甚

答兩廣總督熊近湖

前承差去妄有所陳管闕之見聊以助公一籌耳茲辱翰示欲以貴恙引去大失鄙望炎荒勸勦使公獨勞僕輩亦何嘗不以爲念但善作貴於善成克終乃爲有始萬一代公者不得其人致墮前功則公之盛

美母乃亦有缺乎大疏部已案候願勉思 國家大計慎醫藥厚自持以副羣望幸甚

### 答司空林退齋

近見南中駱掌科疏始知公所以屢疏求去之意雖然世之所望於大人君子者固以其能弘濟於艱難也古人迂身善君不潔其名願勉抑高懷以副羣望

### 答閩中涂巡撫

廣寇遇閩師而奔勢窮力憊折腰之免虞者得而置之論其功閩自不可同日而語但以兩省事體不得不均處耳功高賞薄卽鄙心亦深歎焉

卷二十一  
三  
答廣中督撫

辱華翰領悉不用斗粟片甲而使積年逋寇皆束手歸降買犢賣刀之化不足以媲美矣慰甚慰甚賴兵援廣聊以拯一時之急耳向此中有欲議留蔡將者僕力止之今廣寇漸平不容再借矣

答方巡撫金湖

惟丈雅望雄才久困鹽駟茲者諸公之舉實出輿議之允正人登顯國家之幸也賊入應州據報四萬賢不過一二萬兩鎮之兵併力蹙之諒不敢深入但虜居塞外者尚多宜鎮空虛殊爲可慮丈宜與繼津

公孰計嚴爲之備

答施兵憲

辱別教領悉往者部擬推陞稍有一二間言後訪之  
郡中士民咸切傾戴其議卽息公更勿以此介意但  
委心任理仗大公履至正至於道之通塞有命存焉  
決非人所能爲也今人心叵測時事艱難遇事則委  
難以責人事平則抑人以揚己誠有如來諭者至於  
居上位者一有爲國家任事之心尤不免於人之  
相議捧誦至此再三興慨嗟乎此正僕之茹苦而不  
以告人者也然僕之所以自處則亦唯委心任理仗

大公履至正而以通塞付之於命耳將奈何哉辱以僕爲知己故敢盡其區區

答南司徒馬鍾陽

惟公昔在司農僕忝冑監以官曹之伊邇幸得時時瞻儀範奉清論蓋傾向者久矣比者主上留心國計召公於留京委以重任輿情顒顒方以得人爲慶公乃獨眷念慈闈浩然長往旣違鄙願又孤衆心詢知來使言太夫人福履倍增公亦靜攝愈勝不知承歡之暇亦嘗以主恩士望爲念否乎僕因緣際會謬叅重寄深惟寡昧無補於時惟有薦賢一念庶可

以報塞於萬一而今海內名流適於當世之用寔未  
有踰於公者此惓惓之愚所以結注於左右而不能  
已也李帥功名著於閩中旣與地方相安何必又爲  
更置辱論俱領悉矣

答張廬山

杜銓部問可爲督學者僕妄以已見列足下及海內  
名士十餘人以應之今皆次第登敘獨足下尚滯薄  
書之任然或又以足下之才器卽亦畀以重且大者  
不必更煩於文墨間也幸努力自愛僕寡昧竊抱敬  
賢之心居常所推轂天下士甚衆然而皆不欲人知

敢以口惠市德於足下哉致煩遣謝深以爲媿人旋  
草草附復厚惠槩不敢領輒用歸璧統惟鑒原

答督撫魏確菴

公之情惊苦切西石已備言之顧以疆事孔棘不能  
從命耳茲奉來教卽白之太宰徐當爲公處

答督撫王鑑川

諸鎮斬捕首虜幾二百級自來出塞之功未有如是  
之奇者宜破格錄敘以風諸將而人之所見乃有大  
不然者其時僕偶以病出沐不獲與議徑從薄賚然  
公論皆以爲未允俟勘疏至尚當有處也

答南司徒張華峰

僕以孤直不能徇俗取容謬當鼎軸爲衆所忌聞公以令親陳道長在南中密爲護持感戢洞於心膂然知公此心非獨私於僕爲世道慮也今歲南北俱水閭閻嗷嗷此中隱憂伏禍又有不可勝言者僕以寡昧秋毫無補於時而拙直之性又不能浮沈和光以保榮祿惟當引去庶可逭責耳

答憲長楊晴川

辱示城守保甲事宜皆地方切務但患有司不能着實奉行耳須屢省詳覈之庶不徒爲文具近來前事



視昔何如當事諸公經略亦有次第否今歲雖幸寧  
謐來年尚有可慮諸公爲備果足恃否便中更望密  
示

答剿遼總督魏確菴

遼左重鎮正仗雄才乃西石道公中欸懇至不得已  
勉從所請然區區之愚於交情雖篤而爲地方計則  
踈矣行矣強食自愛墨子之突恐不及黔也

答中翰張後湖

辱揭示領悉疏當案候春初戒行可也令先翁之謚  
不稱其行公評咸以爲歉昨已致書雷院求爲具題

請改矣茲有一事敬問掌記先年張文簡公曾得內閣所藏冊府元龜一部其後文簡公卒於京邸其僕卽將此書於部前貨賣今先翁識其爲閣本也贖而藏之於家嘗語區區曰吾欲將此書仍送內閣以完先代之寶何如僕時起賀曰幸甚此義舉也無何而今先翁亦逝竟弗克踐其言今憶此書必無恙也僕欲倍價奉贖仍歸閣中以卒成先公之志惟執事其幸許之夫此一書也文簡得之令先翁贖之至僕而還之三更張氏皆楚人也將以媿於古之左史倚相能讀墳典丘索不亦美乎

明文簡公石首張壁中翰先  
公系陵張治也初謚文隱

### 答遼東巡撫方金湖

遼左重鎮仰仗雄才簡命自天允孚輿論在僕私衷  
尤爲欣忭雲中賴公秉持公議聞燕院近亦洞豁無  
苛責皆公調停之力也

### 答山西按院饒成山

遠辱華翰知旌節已臨三晉慰慰別諭云云深感至  
愛太宰爲人所傾殊可歎憤喜高老起用素在同心  
世事尚可爲也

### 答湖廣按院雷信菴

屢辱華翰深荷遠情龍湖老先生改謚事卽辱允俞  
存沒銜感聞榮滿屆期代者擬是遵化陳君此君沈  
毅敏達可繼公後敝府太守代趙者王君亦佳士也  
地方有賴矣

答遼撫方金湖

辱教知旌節已東無任欣慰遼左虜警多在春間防  
禦之策所宜預圖二帥更換原非鄙意但議者以彼  
中鎮巡頗不相能欲借曲處之耳議尚未定辱示俱  
見留念邊鎮至意

又

適借東藩又移西鎮諸老之意僕不能違所喜馬帥  
素辱知遇文武輯睦邊方之幸也初春已聞有小警  
願遄發征旆以慰將士之望

答湖廣撫院劉唐岩

承差至辱華翰領悉監利賊首旣已首服自宜宣布  
威信許其自新土司讐殺雖其恒態但至於劫質衛  
官則事體重大必須會題惟不宜輕調兵動衆矣從  
容以計取之幸責成該道兵備於軍衛有司中選有  
智略知兵機者專任其事或計誘相近土司伺便圖  
之可也去歲敝縣通欠漕糧甚多荷臺下曲處其有

德於地方甚厚但借過藩司糧銀亦宜補還也

答荆守徐太室

辱華翰感戢厚情惟公卓行宏才久淹外服屬者楚中學憲缺擬借重而銓曹以公資望既深旦夕且將畀以重且大者不欲更以文墨相煩而不知公之標格蘊蓄於此更爲宜也老親家居深荷垂念銜感無任施州土官事前已具復傾科中以爲言生譬之金崗事情與四川都蠻不同故部覆亦甚圓活大抵需以歲月計處之自定

答閩撫熊北潭

比聞山海餘孽尚爾縱橫知公籌畫爲勞乃其用兵次第則宜以海寇爲先浙兵旣到宜及其鋒而用之若屯聚坐食無他奇道以取勝使山賊得乘吾之懈非善計也

答楚按院雷信菴

比者旌節按行荆南辱枉顧敝廬兼承厚貺感荷感荷辱教江堤經始羣盜解散在僕得免鄉里之憂黎民咸獲安恬之利公之造福於楚人所宜世世而俎豆之者也差人旋草草附謝感仰之私萬不悉一統惟亮存